

ARUBIANA TIRA MATA NA HULANDA



BEFAD NUNCA A PER-
JUDICA NINGUN HENDE
NINGUN CAUSA NI NIN-
GUN NACION

DIARIO

DI ARUBA

Bo Matutino
Netamente Arubiano

DIAHUEBS 8 AUGUSTUS 1985
AÑA 4, No. 1391

DELEGACION DI HULANDA TA BAY CARACAS

Relaciona cu asunto di Shell

SINDICATONAN DI SHELL A RECHAZA PLAN SOCIAL



E siman aki na Mc Donalds por a ripara hopi movecion tur merdia di muchanan. Ayera DIARIO a bishita e lugar mirando e cantidad di muchanan presente atrobe y a ser informa cu ta siman di mucha. Nan tabata tin poppenkast den siman, y ayera tabata tin dia di pintamento y obra di man., mientras cu awe tin merdia di recreacion preparando tambe pa bishita di e clown popular Ronald cu lo ta na Aruba atrobe diasabra awor y lo presenta pa muchanan den Wilhelmina Park. Ariba e foto por mira parti di e mas o menos 50 muchanan ayeramerdia durante oranan di pintamento.

SEGURIDAD NACIONAL DI MERCA TA SER MENAZA

ORANJESTAD(AAN)—Un grupo di 43 senador americano di tanto partido republicano como di partido democratico, a pidi gobierno di Merca ayera pa laga haci un investigacion si importacion di gasoline y otro productonan di refinacion ta trece seguridad nacional di e pais den peliger.

Den un carta dirigi na ministro di comercio Malcolm Baldrige e senadornan ta expresa nan temor cu Estados Unidos ta bira mucho dependiente di refinarianan di exterior y cu e pais ta bira un blanco mas facil pa terroristm.

Iniciador di e peticion ta e senador demócrata Bennett Johnston, cu hunto cu otro senadornan na 1981 tambe a haci un proposicion similar. For di e aña ey 111 refinaria a sera na Merca y asina tambe capacidad di refinaria a bira menos den e pais.

Ultimo añanan importacion di gasoline a aumenta bastante u diferente compania a haya nan obliga di pidi gobierno pa ayudo financiero.

Johnston y e 42 otro senadornan ta di opinion cu e desarrollo aki ta trece seguridad nacional na peliger y cu e pais ta bira mucho dependiente di importacion di petroleo crudo. Ministro Baldrige a trece dilanti caba cu for di otro investigacionnan a conclui cu e peliger aki ta existi di verdad.

Presidente REagan te ainda no kier a tuma pasonan pa limita importacion di gasoline y otro productonan petrolero.

NO MIEMBRONAN DI NACIONES UNI POR PAPIA DEN ASAMBLEA GENERAL

NEW YORK:—Noord y Sud Korea, Vaticano, Monaco y Suiza, tur di nan paisnan no miembro di Naciones Uni, pero cu tin si status di observador, a ser invita pa e aña aki dirigi palabra durante e asamblea general, segun vocero Joe Sills a laga sa ayera.

E invitacion ta bini di secretario genral di Nacionnan Uni, Javier Perez de Cuellar y ta den cuadro di celebracion di 40 aña di existencia di e organismo mundial.

E asamblea general lo dura 13 siman e aña aki y ta habri dia 17 di september.

Esaki ta prome biaha cu den e Asamblea general na cual tin 159 pais miembro, cu paisnan cu tin status di observador y cu no ta miembro lo por dirigi palabra.

AVP DISPUESTO PA COOPERA CU MAYORNAN PA TENE SCHOOLNAN HABRI

ORANJESTAD(AAN)—Segun Lider di AVP Sr. Henny Eman a ser spera ta na ultimo momento diamars ora cu a entrega mocion di AVP, caminda ta ser spera cu ceramento

di 3 school no ta segun reglanan existente na Aruba, AVP tabata tin e speranza-mirando e cantidad di firma cu a ser entrega protestando contra e ceramento, cu Bestuurscollege lo a cam-

bia su opinion y hasta retira e proposicion.

El a bisa cu e speranza di AVP tabata ainda cu di banda di miembronan di fraccion di MEP lo no a duna sosten na e cera-

mento di school.

El a bisa di ta lamenta cu Bestuurscollege di Aruba ainda no a realiza e importancia di enseñanza na Aruba y sigur schoolnan basico.

E speranza tey ainda pasobra ley ta permiti mayornan cu tin alumnonan cu ta bay na e school cu ta cera, cu a base di un carta di protesta entrega na gobernador por percurpa e school keda habri.

E cantidad di carta mes-ter ta por lo menos 20 pero mirando e reaccion cu a ser causa despues cu e comision a busca firma protestando contra ceramento di e schoolnan, AVP ta kere cu si e mayornan kier tene e tres schoolnan habri protestando pa medio di carta cu AVP ta dispuesto ta coopera pa compilanan y ainda scapa e schoolnan di cera.

REMARCA DI DIPUTADO V.D.KUYP TA FOR DI SLA

Segun Sr. Henny Eman

ORANJESTAD(AAN)—Sr. Henny Eman ayera a reacciona tambe ariba declaracionnan di diputado v.d. Kuyp encunto ceramento di e sector Arubano di Universidad di Antillas.

El a bisa cu e sa cu na cuminzamento di e universidad por ta posibel cu e nivel di e Universidad no tabata mes halto cu e nivel na Hulanda, pero seguramente ultimo

añanan e nivel di universidad di Aruba, ta siguramente e mes nivel cu el a haya na Leiden.

Segun sr. Eman no solamente cu tin docentenan bon di Antillas mes pero tin un cantidad di hulan- des y tin un cierto cantidad cu ta bin regularmente pa cierto college y e ta kere cu nos alumnonan tin e mes nivel cu cualquier otro pais y sigur compara cu Hulanda.

“Nos sa cu e resultado di estudianan di esnan cu a caba cu nan estudionan na Aruba tabata di nivel top competente cu esnan di Hulanda.

“Nos ta haya cu e remarca di Mr. John v.d. Kuyp tabata for di sla y no tabata den su lugar, pero ta ilustra si e pensamentonan cu ta biba den e gobernacion actual”, el a laga sa.



dia prome di augustus 1950 Sr. Rudolf Reinier de Kort a drenta servicio di Gobierno como schrijver b. na Postkantoor di San Nicolas y dia prome di augustus e aña aki el a cumpli 35 aña den servicio y tin rango di commies 1e klasse.

Na aña 1953 dia prome di augustus el a ser promovi pa klerk B y despues pa klerk 1e klasse na 1960 y 4 aña despues Sr. de Kort a bira Adjunct Commies y di prome di december 1969 el a ser promovi pa Commies, y dia 22 di mei 1971 como Commies 1e klasse. For di dia 17 di december aña pasa e ta encarga cu coordinacion di Postpakket Afdeling, Expeditie Afdeling y Loket en Gelddiensten di Postkantoor Oranjestad y San Nicolas. Ariba e foto aki por mira momento cu el a ser honra durante un ceremonia na Postkantoor door di hefe Sr. C.F. Dijkhoff kende a entrega e envelop tradicional den presencia di afdelingschefs Benny Koolman, Franklyn Croes, Hector Quilotte, Karel Jacobs y Juancito Koolman.



LE FAMA
BAZAAR y ZAPATERIA

A CABA DI RICIBI
JEANS Moderno, FLANEL y CAMISA pa temporada di School y tur,
KEDS ta bai na 10o/o di REBAHO



ORDENANZA PA PERMISO

Bestuurscollege di Aruba ta anuncia cu entrante 9 di augustus 1985 durante 14 dia lo tin oportunidad pa un y tur pa tuma conocimiento na Bestuurskantoor, Departamento pa Asuntunan General y Juridico di un peticion cu a ser haci pa obtene un bierhuis v un restaurantvergunning B pa e parcela De La Sallestraat 60.

E permisionan aki ta concerni venta di bebida cu poco alcohol, manera cerveza y tambe cuminda prepara na un manera facil un y otro pa consumo den e parcela pa cual e permisionan lo ta valido. Durante dicho termino di 14 dia tur hende tin e derecho di laga sa por escrito su obhecion contra di dunamento di e permisionan aki.

SCHOOL DAYS
...are here again

Back To School

20%DESCUENTO
Ariba productonan di calidad marca:
Buster Brown, Carter, Stone Apple Tree y mucho mas.

Tambe na Rebaho:
Kit y Shoulder Bags

Riba nos lote nobo di JEANS nos tin 10 o/o Alavez nos tin un OFERTA ESPECIAL: na cada compra di Fls. 25,00 bo ta tuma parti den un rifa cu cual bo por gana UN VALE di Fls. 100,00 pa haci compras nan di school na Boekhandel Mariska.

Sorteo lo tuma lugar dia 13 di Augustus 1985

SALE ta cuminsa dia 29 di juli te cu 17 di augustus 1985.

"A STAR IS BORN"
Nassastraat 78, Tel. 25759

ARUBIANA TIRA MATA NA HULANDA

ORANJESTAD(AAN)—E noticia tristo a yega Aruba ayera cu na Hulanda durante un tiroteo cu a tuma lugar, un Arubiana, Yolanda van Horst Hart, a ricibi un disparo y a fallece a consecuencia di e herida ricibi.

Segun e informacionnan, e señora tabata cu su esposo na Amsterdam y nan lo a yega na un sitio unda aparentemente tabata tin un pleito cu tiroteo.

E señora lo a sali di su auto net na e momentonan ey y a ser alcanza pa un disparo cu a tuma lugar.

Yolanda van Horst Hart a bay Hulanda cu su 5 aña di edad.

E ta casa y biba na Vlaardingen, y ta laga

atras tambe un yiu.

Otro noticia di Amsterdam tabata di un hincamiento cu a tuma lugar.

Den e caso aki un persona a perde su bida y otro a keda herida.

Number di e personanan aki no a ser duna sinembargo. Ta conoci si cu un persona a ser detení.

E caso aki a tuma lugar na Houtmankade-Zoutkeetgracht den tercer piso di un cas. Aki un homber di habla ingles lo a ser herida y despues a saca un arma y cuminsa hincan esnan presente te cu e pleito a continua ariba caya.

Den e lugar unda e caso aki a tuma lugar regularmente tin traficaion di droga segun polis a infor-

ma.

Segun e informacion, intencion di esun cu a hinka y otro complice tabata pa tira e cadaver

di esun mata den gracht, pero no a logra den nan intento.

Ningun informacion adicional no a ser duna di e

caso aki ya cu e dos personanan aki a desaparece.

Un di cuatro persona envolvi den e caso sinembargo ta deteni.

DELEGACION DI HULANDA TA BAY CARACAS

Relaciona cu asunto di Shell

ORANJESTAD(AAN)—Hulanda lo manda un delegacion di expertonan pa Caracas e siman venidero pa papia cu Venezuela encunto posibilidadnan di mantene e refineria Shell di Curacao habri, segun ministro Jan de Koning a informa ayera na Curacao.

Segun de Koning, Hulanda pa medio di e canal nan usual diplomatico, tin suficiente indicacion haya cu tin un base pa por sigui cu deliiberacionnan.

El a laga sa cu pa locual ta concerni hulanda tur opcion ta habri ainda y ta bay trata awor di yena lugarnan habri.

E decision pa manda un delegacion di expertonan pa Hulanda a ser tuma ayera mainta, segun e ministro pa asuntonan Antillano cu ta di bishita na Antillas actualmente.

E no kier a divulga sin-

embargo kendenan lo ta den e delegacion hulandes.

el a laga sa si cu no ta intencion pa tin un otro gobernante homber of muher den e delegacion.

Expertonan Antillano lo atende e deliiberacionnan si, segun Drs. Jan de Koning.

Puntra ariba un reaccion ariba e expresion di un vocero di Shell cu e compania no tin necesidad di petroleo barata, de Koning a bisa solamente cu esey ta un informacion interesante.

Segun gobierno di Aruba:

DOCTER DI CAS MESTER TA ALCANSABEL NA CUALQUIER MOMENTO DI DIA

Specialistanan tambe

ORANJESTAD(AAN)—Den un comunicado di Servicio Informativo di gobierno ayera, ta ser menciona cu despues cu Gobierno a elimina e funcion di asistentenan medico na hospital, varios reaccion a ser tendi y lesa den medionan di prensa local. E comunicado ta bisa cu e decision pa elimina e funcion no solamente ta den cuadro di e medidanan di austeridad pero tambe mester ser mira como un intento pa mehora e calidad di nos cuidio medico.

E asistente medico su funcion tabata pa asisti specialistanan den caso- nan di falta di personal, y tambe duna e prome asistencia na poli, prome cu e especialista yega.

Pero den curso di añanan e asistentenan medico a haya nan mes ta ocupando e puesto di especialista of di docter di

cas.

Cu otro palabra e asistentenan medico a haya nan mes confronta cu un responsabilidad hopi grandi. Y ta e responsabilidad aki mester ser carga primeramente pa e docter di cas y pa e especialista.

Segun e comunicado, ta sosode hopi vez cu un patient ta bay hospital pa lo minimo, siendo cu si e tuma contacto cu su docter di cas, esaki mes por a yude. Y ora ta trata di casonan grave, e especialista mester por ta alcansabel pa trata e patient na hospital.

Ora ta existi un base di cooperacion y confianza entre esnan concerni esta e patient, e docter di cas y e especialista anto e cuidio medico di nos pueblo ta garantiza. Na momento cu e patient acerca su docter di cas, esaki mester ta alcansabel na cualquier momento di dia.

Y si e mester manda un patient pa un especialista, esaki tambe mester ta alcansabel.

"Actualmente docternan y specialistanan por ser alcanza via medionan di comunicacion moderno manera telefon, page boy, centro di alarma y aparato pa contesta telefon. Manera a ser menciona caba, e decision pa elimina e funcion di arts asistent ta na bienestar di nos salubridad publico y muy en particular na bienestar di e cuidio medico di e propio patient", segun e comunicado.

Na final ta ser bisa cu paisnan Europeo, manera Hulanda cu un sistema di cuidio medico moderno y optimal no conoce e funcion di artsasistent. E relacion patient-medico di cas y especialista ta asina bon cu no ta necesario pa traha cu artsasistent.

SINDICATONAN DI SHELL A RECHAZA PLAN SOCIAL

ORANJESTAD(AAN)—Informacion di Curacao ta bisa cu e sindicatonan di Shell, PWFC y Astek dentro di 24 ora (cual ta termina awe mainta 10 or) kier un contesta di Shell ariba un alternativa cu nan a entrega relaciona cu retiro di trahadornan di Shell.

E plan di retiro cu Shell a entrega como plan social pa e sindicatonan ta completamente inaceptabel.

Esaki ta locual e sindicatonan a informa ayera.

E sindicatonan ta exige tambe di Shell cu e refineria lo keda den situacion di operacion na momento cu e ser traspasa pa Gobierno di Curacao y Gobierno Central despues cu yega na arreglo di e

debenan cu Shell tin cu Antillas.

Segun e sindicatonan Shell no mag bay over na desmantelacion tampoco mientras cu tin deliiberacionnan tumando lugar entre Hulanda, Venezuela y Antillas pa mira si lo por tene e refineria den operacion na Curacao.

Presidente Roque Koeijers di PWFC a califica e plan social di gerencia di Shell como un plan asoc-

ial. E ta hopi menos di lo cual e trahadornan normalmente mester haya, segun Koeijers.

E no kier a menciona sinembargo si e sindicatonan lo bay over den accion si esaki ta necesario. Nos ta sperando, el a bisa.

INFORME DUNA ENCUANTO ABUSO POLICIAL DIALUNA ANOCHI

ORANJESTAD(AAN)— Na redaccion di DIARIO a presenta diamars atardi Sr. Ricardo Kock di Cadushi Largo 17 cu un remitido encuanto un supuesto abuso policial cu a tuma lugar cu e joven W. kende lo tabata un di e ocupantenan di e auto cu polis a persigui dialuna anochi, y cu hasta tiro di advertencia a ser duna na dado momento pero e auto a sigui core cu mas hende den dje.

Sr. Ricardo Kock a presenta hunto cu W. y a entrega un remitido na DIARIO ariba un supuesto abuso policial cu el a presencia e anochi ey.

E remitido cu el a entrega ta bisa lo siguiente.

Sr. Redactor

Danki di a permitimi un espacio den bo corant tan lesa. Motibo di cu mi ta butando un remitido den e corant aki ta door cu dia luna dia 5 di augustus na Sabanilla Abao mi persona a mira claramente con polis ta abusa di hende.

Mihor bisa, abusa di un mucha homber menor di edad y un muher cu tin un baby di un aña y mei.

Dialuna anochi mi ta sinta patras di cas den cura bao di un palo. Net un rato prome e yiu muher di e doño di cas ta bisami cu e ta sinti'e nervioso pasobra el a fia su ruman homber e auto pa bay haci'e un respondi bin back, pero awor e ta spanta pasobra e stima su auto y e no kier pa nada pasa e auto.

Ni un 5 minuut despues mi ta mira con su ruman ta yega cas, pero su tras tabata tin 3 auto di polis. El a dreña cura di cas, pero a sali otro banda y poco pariba di e cas, el a para e auto y a baha core dreña mondi. Pero dos polis a alcance y a cargue cu sla. Despues un a gar'e na pia y e otro a gar'e na su mannan y nan a cuminsa carg'e bin cune.

Anto mama di e mucha homber tabata mira con

nan tabata abusa di su yiu y a gritanan stop di abusa di su yiu.

E yiu homber tabata yora di dolor y nan a bente abao na suela y cuminsa sut.e cu klop y schop'e malamente, y ora cu el a cuminsa grita di dolor, e polis a troce su cachete.

Mi tabata mira claramente con su mama tabata grita masha duro mes, pa nan stop di abusa di su yiu.

Bon mi ta compronde cu e chofer a viola ley di trafico door cu e no a para, pero ami ta haya cu nan no mester trata hende di e sistema ey, pasobra ya cu nan a gar'e nan por a hink'e den auto y bay cune, maske cu ta un pasahero e tabata den e auto.

Despues e ruman muher cu ta doño di e auto a bisa mi pa mi bay cune na e auto pa e wak su auto y pe busca su yabi.

Yegando na e auto el a cohe e yabi di switch y e polis a yega cerca y kier a kita e yabi for di dje.

Ora cu el a puntra e polis ta kico a pasa cu su auto, e polis e ora ey a hise den halto, y dal'e abao den style di judo.

E ora ey si mi no por a wanta mas y mi a bisa e polis stop di abusa, bo no ta mira cu ta un hende muher e ta?

E mes un momento un otro polis color scur a core yega y a saca su pistool y a arme y bute ariba mi y a gritami "bai di aki banda of mi ta dal bo un bala. E mes un momento ey mi tino a pasa ariba 15 di september 1980 con un polis ta tira un bon amigo dimi mata y e difunto ey ta omo di e mucha homber cu nan a maltrata malamente dialuna anochi.

Mi a corda mes ora con despues e polis a bisa cu el a bay pa tir'e den su pia pero e difunto a bula den rooi y e proyectil a alcance den su cabez.

Mi a dicidi di aleha for di e sitio hunto cu e doño di e auto cu tabata vora pasobra su dede a

verzwik y su pianan tabata tur raspa.

Ami a bay di eynan—no pa miedo pero simplemente no hinka sufrimento den curazon di mi familianan, pasobra si ta pami mes cu tur e abuso nan cu mi a mira, hopi biaha bo ta perde cabez.

Y nan cu ta manera fiera den uniform di polis ta cla pa tira un vez y sufrimento ta pa familianan.

Ami ta haya cu mester buta un estudio pa e polis nan ey, pa siña con trata hende. Ni bestia bo no ta trata di e sistema ey.

Kizas ora cu nan tin cu actua mes, nan no ta actua. Polis tin cu duna respet tambe. Of kizas ta pasobra cu nos ta biba den campo nan ta pensa cu nos no conoce ley?

Maske cu mi sa cu ta poco dificil pa gana nan pasobra hopi biaha nan ta saca mentira mi no ta bisa cu tur polis ta mescos, pero cu esnan cu mi a mira dialuna anochi tabata actua masha malo mes y a abusa masha pisa mes.

Bon señor aki mi ta ter-

mina cu mi remitido. Un vez mas masha danki pa e espacio grandi den e corant tan lesa.

Nota di Redaccion;

Na varios ocasion ta yega na redaccion personanan cu ta denuncia un of otro caso cu a tuma lugar entre un of otro persona y polis. Despues ta resulta cu e casonan no ta asina of cu e lo por ta exagera.

Di e caso aki, DIARIO por bisa cu W. tabata presente na momento cu Sr. Kock a trece e remitido.

DIARIO a puntra W. si el a lanta contra polis y el a declara cu "no".

Si e tabata bao di influencia "si".

Ariba pregunta si el a insulta polis el a declara cu "no".

El a bay completamente di acuerdo cu e remitido.

Pero motibo cu a publica e remitido y bini cu e comentario aki no ta e caso di persecucion, ni e abuso policial denuncia den e caso, pero DIARIO por a mira con lomba di

W., tabata completamente habri cu slanan cu el a ricibi. E tabata malamente maltrata.

DIARIO a puntra si funcionarionan halto di polis a mire e slanan cu el a ricibi y el a bisa di no sa kende ta kende di nan.

DIARIO mes a tuma contacto cu warda di polis y a papia cu un funcionario cu a recomenda pa W. bini na warda serca dos funcionario halto di e departamento concerni. Con a para no ta conoci, y no ta conoci si W. a bay, pero si por bisa cu si ta polis a maltrata W. manera e sla nan tabata muestra ariba su lomba, schouder y braza, esey ta un caso serio di maltrato y cu lo mester investiga e caso aki den seno di cuerpo policial, especialmente si ta manera W. a bisa cu ningun momento e no a lanta contra di polis, pasobra el a sali di auto, trata na core bay, pero ta cay el a cay como cu e tabata bao di influencia, y ey nan el a ser maltrata.

MATRIMONIO DI ACTRIZ LESLEY ANN DOWN A KIBRA

LOS ANGELES: E director americano di pelicula William Friedkin a entrega peticion pa divorcio di su esposa Lesley Anne Down, e actriz britanico di mas renombre y el a exige pa e keda cu su yiu homber di dos aña.

Friedkin di 45 aña, director di pelicanan popular manera The French Connection y The Exorcist a bisa cu e motibonan ta cu nan no por sali cu otro.

Dia 28 di juni e pareha a separa di otro. Lesley Ann Down di 31 y su yiu Jack ta biba na Londres.

Lesley Anne Down a hunga papel di Georgina Worsley den e serie Upstairs Downstairs y tambe el a hunga papel estelar den The Great

Train Robbery.

Dia 17 di juli 1982 el a casa cu friedkin na Malibu den California. Friedkin e tempo ey a caba di divorcia di e ac-

triz frances JeanneMoreau. Down tabata casa cu e tecnico di pelicula Henri Gabriel cu el a conoce durante filmacion di Sphinx na Egipto.

AIDS COMO MEDIO DI CHANTAGE

STOCKHOLM: Un automobilista Sueco cu siman pasa aser deteni na Slaapstad di Stoczulm, y hiba warda di polis pa prueba di alcohol, a adverti e agentenan cu e ta sufrir di AIDS y cu e lo morde nan si nan no lagu'e den libertad.

Radio Sueco cu a informa di e caso aki ayera a agrega cu e homber di 28 aña cu a muestra un attest di hospital a ser hiba cas pa motibo cu ningun

agente policial kier a yega cerca di dje y cu ningun hospital kier a acepte tampoco.

Ta ser spera sinembargo cu su rijbewijs lo ser kita.

Problema cu bo aparato-
nan y instalacionnan elec-
trico, airc, frigidaire,
stoof di gas etc. etc.

BEL:

46209

Djo Farro

ZEEWIJK 13 - A

BOYSIE CROES A HACI'E ATROBE

Para den Rij pa mira caha di orgel

ORANJESTAD(AAN)—Ultimo lunanan localmente por a ripara cu conhunto Criollo di Boysie Croes ta ser busca continuamente pa tur sorto di actividad, y especialmente pa fiestanan y aniversario.

Ta trata aki di un conhunto cu tin su „ups y su downs“ ariba nos isla pero ultimo dos añanan e tin mas „Ups“ y casi nada di „downs“.

Na varios ocasion e aña aki nan a toca den Bon Bini Festival y por a ripara e atencion di turistanan pa nan musica, y ademas nan ta logra pone e turistanan ariba pista di baile cu nan wals, tumba, danza, polka, etc.

Pero djamars anochi e interes grandi tabata pa haya informacion di e grupo aki y ariba nan musica.

DIARIO tabata presente pa scucha e elogionan di turistanan ariba e musica cu a ser interpreta y e show cu a tuma lugar.

Un grupo grandi di e bishitantenan a keda encantado cu e musica y spliacion cu nan a haya di cada ritmo y a lamenta cu na nan hotel (nan) nada di nos musica tipico ta ser presenta.

Tabata tin lamento tambe cu na hotelnan no ta propaganda e festival aki y cu ta via via nan mester a tende cu tabata tin e actividad aki.

Otro reclamo ta locual 5 siman caba DIARIO ta tende na un hotel local di turistanan y cu a ser ripiti na e festival pa varios bishitante.

Esaki ta cu na hotelnan no ta ser haya tocamento

di musica tipico ningun caminda. „Nos no a bini di New York“ pa scucha rock aki, pasobra nos ta fada di dje na nos mes lugar caba“, ta e keho constante. Pa añanan caba esaki ta un die cosnan cu ta ser reclama di parti di turistanan, pero si ripara bon, na hotelnan, nan tin sea emisoranan cu ta ser scucha den tur departamento, of ta ser transmiti pa medio di e comunicacion interno, sintanan of cassettenan di musica di exterior sin nada tipico.

Na Holiday Inn por ehemplo ultimo 5 simanan por a ripara con encantado turistanan ta keda no solamente cu e show di Simadanza, pero tambe cu e musica Antillano cu ta acompaña e bailenan y di cual nan ta haya spliacion tambe.

Na Bon Bini Festival e siman aki tabata tin e caha di Orgel Gloria.

Na dado momento tabata tin turistanan para den rij pa por a haya un oportunidad pa tira un bista den e caha di orgel y pa saca portret di dje of banda di dje. E musica a encanta e bishitantenan y masha asombra nan a keda di e manera cu e caha ta traha, y con ta saca e musica for di e caha aki.

Tur esaki ta locual nan no ta haya na hotelnan tampoco pa goza di algo di nos identidad cultural.

Hotelnan ta kibra cabez cu buscamento di gruponan di afo pa actuacion pagando nan miles di dolar, pero e artistanan local dinos isla mes ta ser negligia.

Nada no ta haya di

cultura di nos isla den e hotelnan y esaki ta cosnan ariba cual ta ser haya hopi keho di turistanan tambe.

Por tuma ehemplo di

Charlie Simmons (Charlie Coco). Charlie ta experto den cortamento di coco, y semanalmente cantidad di turista ta rond di su stand, djies

pa mire corta coco, habri nan y duna servicio. Ta algo simpel, pero tur esaki ta cosnan cu turistanan kier mira, y masha poco di cos asina ta ser brinda na nan ariba e isla aki.

REGISTRACION DI PRIKICHI Y ARA

ORANJESTAD(AAN)—Te cu prome di november por laga registra prikichi Arubano of Ara blaw na Servicio Veterinario.

Pa e registracion aki e doño di e prikichi of Ara mester cumpli cu cierto condicionnan entre otro e mester declara con el a haya e prikichi of ara.

E bestia mester ta un bestia di cas cerca familia y e mester ta manso.

E veterinario mester duna e parha un renchi na pia.

Si ser constata cu parhanan a ser busca den mondi, anto e animalnan aki no ta bini den remarke pa laga registra nan.

Cu e registracion aki e doño por pidi permiso pa laga e parhanan drenta Hulanda.

Pa por drenta Hulanda cu un prikichi e doño mester pidi un permiso di

importacion cerca ministro di cria y pesca di Hulanda. E permiso aki mester ser pidi basta tempo adelanta.

Tambe ta ser corda na un y tur cu importacion di lora for di Sur America ta prohibi. No ta permiti pa trece loranan Latino ariba nos isla.

Tambe ta asina cu e prikichi Arubano, e asina yama Maisparkiet, ta ser protega.

CALOR Y CARIÑO ARUBANO

ORANJESTAD(AAN)—Dia 11 di juli, despues di un alarma falso di bom un cantidad grandi di turista a keda Aruba un dia mas debi cu nan no por a regresa nan pais e mes

anochi.

Tabata trata aki di un grupo cu a bini di Texas, y cu cooperacion di AHATA y Cooperativa di Taxinan, nan no a sufrir

ningun inconveniencia ariba Aruba pa e dia adicional aki. Nan a haya estadia, cuminda y transportacion gratis.

Un di nan, Señora Ferguson y su yiu muher na nan yegada na Teras a dindi di manda un carta pa gerencia di Holiday Inn Hotel unda nan a keda, pa e cooperativa di Taxi y pa Oficina di Turismo.

E carta traduci ta bisa lo siguiente: „For di tur isla den Caribe cu mi a bishita, Aruba ta e unico isla cu lo mi kier regresa pa un vacation. E amabilidad y simpatia di e hendenan di Aruba ta loque mas a keda graba den mi mente. Por supuesto mi ta kere cu Aruba tin e lamar y beach mas bonita. Pero lamar y beach bo por haya tur caminda.“

Hende ta haci e diferencia y e Arubano sin duda a haci mi sinti e diferencia.

Mester elogia e Arubano nan pa e hecho cu nan ta comparti nan precioso isla cu asina tanto cariño y calor Humano“, Sra. Ferguson a laga sa.

GRUPO CHANGO DEN CENTRO DI BARIO BRAZIL

ORANJESTAD(AAN)—Directiva di Centro di Bario Brazil en cooperacion cu Instituto di Cultura ta organiza diadomingo awor un show cultural cu e grupo folklorico di Venezuela, Chango y grupo folklorico juvenil di Centro di Bario Brazil.

Tambe lo tin demostracion di Teakwondo.

Entrada lo ta completamente „un sonrisa“.

Grupo Chango aña pasa tabata na nos isla y a cosecha exito aki. Ta recomendable pa mira e show folklorico aki di Chango.

E grupo folklorico Juvenil di Centro di Bario

Brazil, bao direccion di Sra. Frans, tambe ta un grupo cu ta bale la pena mira den e anochi cultural.

Diamars anochi den Bon Bini Festival e grupo di baile aki a conquista aplauso grandi di e turistanan y hendenan local presente cu algun baile cu a cay masha na agrado di tur hende. Especialmente e manera espontaneo di drenta publico y busca pareha bishitante y local pa balia cu nan a ser aprecia masha hopi.

Exitoso tabata nan baile di sinta y nan mazurca entre otro.

Ban school contento, yen di confianza y na moda cu articulos di



E unico tienda cu tin tas, etui, stuf, slijper, etc. Tur cu ta combina bunita cu otro.





TELEARUBA

DIHUEBS 8 DI AUG.
 12.00 Take Two (live)
 2.00 Sign Off
 6.00 Fraggie Rock: "Catch the tail by the tiger"
 6.30 Obra di man: "Klompfen"
 6.45 Gabriel y Gabriela
 7.30 Musical Special
 8.00 Telenoticias
 8.30 Aruba y su Independencia
 9.00 The Bill Cosby Show: "The Join"
 9.30 Culturama: "Jonge mensen op het Concert Podium"
 10.30 International News
 11.00 Money Line (live)
 11.30 Sports Tonight (live)
 12.00 Clausura

AMBULANCE:
 O'stad Tel: 21234
 San Nicolas Tel: 45050

HOSPITAL:
 Tel: 24300
POLIS:
 Tel: 100
CENTRO DI ALARMA
 Tel: 115
 BOTICA NA WARD A
 AUG 3 - AUG 9
 BOTICA DEL PUEBLO

DOCTER NA WARD A
 Dr. J. de Cuba tel. 48833 Cen tro Medico S.N. of via di hospital tel. 24300.

SENADOR SIN FLUS

SAO PAULO: Diamars mainta un señora cu ta haci oficinanan di senadorman limpi den edificio di parlamento di Sao Paulo a tende sonido ta sali for di un di e oficina nan. Eno por a saca afo kico e sonido ta y a dicidi di yama polis.

Ora polis a drenta e oficina cu e cria, nan a bin haya e miembro di parlamento Benedito Cintra den "bunita posicion" cu un muher.

Cintra cu awor ta core riesgo di ser retira, ta

Sigui lesa pag. 10

BOTANICA 'ASTRO SUERTE'
 BO UNICO Y ORIGINAL CENTRO DI SUERTE AKI NA ARUBA
 ARENDSTR. No. 22A TEL 23628

"LA SIBILA"
 BO PALACIO DI SUERTE
 KERKSTR. No. 13 - Tel 23811

CAMINDA UN Y TUR TA COBRA SIGUR !

ZULIA 84447 71810
CARACAS 85667 19050 46541

HOROSCOPO

PRESENTA PA:

CASA NENA

TEL: 45344

CAMA Ariba Abou CU 2 MATRAS Fls. 395,-

Vendemos mas Barato, porque somos fabricantes !



ARIES (21 maart-20 april)

Final di un periodo di problema y desapunto ta acercando. No verwacht mucho di e dia di awe.



TAURUS (21 april-20 mei)

Si bo a exagera anto awor lo bo sinti e resultado. Probecha e dia di awe door di sosega.



GEMINI (21 mei-20 juni)

Bo casa no por compronde bo entusiasmo pa iogra algo. Si bo kier mantene situacion na ca: tranquil miho bo cuminsa splica e motibo.



CANCER (21 juni-22 juli)

Bo tin gana di baha na awa pero bo no kier laga bo sernan stima. atras. Considerando e situacionnan actual lo ta necesario pa haci un viahe.




LEO (23 juli-22 augustus)

Lo ta demostra hopi simpatia pa un hende, pero lo bo bai algo di e persona ey cu lo kita tur e simpatia cu bo a sinti pe.



VIRGO (23 augustus-22 september)

Evita coleganan cu ta busca pleito, miho bo traha boso sin busca opinion di nada serca otro. No worry mucho cu redo.



LIBRA (23 september-22 oktober)

Awe bo programa ta druk. Lo bo hanja un yamada telefonico cu bo mester atende maske bo no kier Ta algo urgente!



SCORPIO (23 oktober-22 november)

Haci un esfuerso pa yega na algo cu semper bo a desea. Yuda un amigo den necesidad.



SAGITARIO (23 november-21 december)

Busca oportunidad nobo y no verwacht cu nan ta bin cerca bo. Busca un chens den e tereno pa cual bo tin talento.



CAPRICORNIO (22 december-20 januari)

Tin un terea cu bo mester haci y cu bo ta hanja un poco dificil. No worry cu nada hacie, lo tur cos ta bai bon.



AQUARIO (21 januari-19 februari)

Lo bo mester pospone un viahe, pa motibo di placa. Situacion financiero no ta di e bon ey mas.



PISCIS (20 februari-20 maart)

Cambianan lo bai bini na trabao, bo salario lo subi un tiki. Bo prefera di kita pero no keda eynan, mihor bo tene pasenshi por bin algo bon.

SUERTE DI PUEBLO

NOMBER:

ADRES:

MI NUMBER DI 4 CIFRA TA:

E COUPON AKI TA VALIDO PA E CORTEO DI:

AUG. 8

PROME PREMIO:

Fls. 100,00 MAS UN MACUTO DI PRODUCTO

SEGUNDO PREMIO:

Fls. 50,00 MAS UN MACUTO DI PRODUCTO

TERCER PREMIO:

Fls. 25,00 MAS UN MACUTO DI PRODUCTO DI E SPONSERNAN.

SORTEO POR WORDE PRESENCIA PA PUBLICO TUR ANOCHI PA 10'or VIA RADIO VOZ DI ARUBA.

DEPOSITA E COUPON AKI NA VOZ DI ARUBA OF NA CANAL 90 PROME CU 8'or DI ANOCHI.

RESULTADO
 SUERTE DI PUEBLO
 10. PREMIO: **7202**
 20. PREMIO: **6881**
 30. PREMIO: **2642**

MUNDO DI MUSICA

Skirbi pa Joy Kock

Sinan pasa "Melao" a presenta aki na Aruba pa prome vez den un show di nan so. Un show cu nos mester comenta ariba. Na principio di e show, Mavis Albertina a duna un splicacion di e popularidad cu e duo ta disfruta di dje na Corsow y cu ta pa prome biaha nan ta presentando nan show na nan propio cas, esta Aruba.

Mi a sinti mi mes un poco desiluciona scuchando e palabranan di Mavis. Mavis tabata expresando e pura verdad. Despues di un aña, e duo cu a nace den O.T.I. Aruba ta presenta pa su propio publico. Pero.....mihor laat cu nunca.

Sharon Rose y Efrein Benita a duna un excelente show. E acompañamento musical tabata di e sector ritmico di Time y sublime. E combinacion di e voznan ta di alta nivel. Tanto efrein como Sharon tin añanan di experiencia como solistas.

Ariba stage nan a brilla den un par di cancionnan tambe como solista. Nos a

ripara un adelanto grandi den Sharon su comunicacion cu publico.

E show tabata bon bishita, pero nos a spera mas aporte di nos hendenan. Durante e show Melao a trece cancionnan di actualidad y algun cancionnan cu tabata popular den añanan '60, treciendo recordonan di Eagle Club (cu a kima) y Trupialen (cu ta cabando poco poco).

E ambiente tabata hopi bon mes durante e show y nos mester remarca cu nos no ta comprende ainda ta pa kico nos hendenan no ta haya mas oportunidad pa duna shownan na nos mes hotelnan. Como invitado tabata presente tambe e general manager di Americana Hotel.

Ta asina aki nos hendenan, haciendo show ariba nan mes, mester sigi lucha pa sobrevivi den nan propio cas. Proteccion di parti di gobernantenan ta cero!!

Nos a haya informacionnan cu tin un tal "entertainment manager" di un nightclub nobo aki na Aruba cu ta tratando nos hendenan na un manera masha denigrante y ningun hende no ta lanta ni un dede di parti di autoridad pa defende nos artistanan. Pasenshi musiconan y artistanan.....Pasenshi.

Nos sa cu ta masha duro pa boso diannan jega..... pero e ta jega. Di esey mi tin e minimo di duda.

Biniendo bek ariba e show di Melao, por cierto Melao kier meen diferente ingredientenan sabroso cu smelt den otro, nos kier a comenta cu e publico no kier a laga e show

termina cu nan aplauso-nan fuerte. Melao mester a bolbe subi stage y canta algun numero mas pa complace e publico entusiasta.

Despues di e show nan a bin sinta na nos mesa y nos a brinda pa e exito di e show, nan proximo gira den Caribe, nan Long Play

cu ta na caminda, y ami a brinda den silencio pa nan, y pa nos otro artistanan grandi, ser reconocidos den nan propio cas.

O.T.I. - ARUBA 1985

INTERPRETE	TITULO	Compositor	Arreglista	Director
1. Francis Jacobs	La paz del mundo	Letra: Francis Jacobs + Poppy Irausquin. Musica: Howard Tromp.	Amado Rosina	Amado Rosina
2. Brenda Henriquez	Motivos para creer en el amor.	Letra: Jossy Herrera. Musica: Gabriel Flores	Daniel Werleman.	Daniel Werleman
3. Sigfried Codoy	Joven descubre la vida	Letra: Edwin Berkemeyer	Reno Steba.	Reno Steba
4. Edwin Berkemeyer	Hombre libre	Letra: Jeffrey Franken Musica: Ruben Geerman + Jeffrey Franken.	Eddy Bennett.	Eddy Bennett
5. Mylene Marquez	Si hay amor	Letra: Don Ramon.	Ruben Geerman.	Oscar Serrano
6. Don Ramon	Un canto a Dios.	Letra: Claudius Philips	Ivan Jansen.	Ivan Jansen
7. Claudius Philips	Allí estaré	Letra: Roberto Martis	Franklin Granadillo.	Franklin Granadillo.
8. Connie Henriquez	Música música	Letra: Roberto Martis	Ruben Geerman + Roberto Martis.	Oscar Serrano.
9. Tommy de Cuba	Brindis de amistad	Letra: Chicho Kock	Ruben Geerman + Roberto Martis.	Oscar Serrano
10. Chicho Kock	Comprendámonos	Letra: Rudy Herrera + Marcelino Paesch	Amado Rosina	Amado Rosina
11. Marcelino Paesch	Allá	Letra: Oscar Serrano.	Ivan Jansen	Ivan Jansen
12. Papito Rafael	Me olvidastes	Letra: Efrein Benita	Oscar Serrano	Oscar Serrano
13. Didi Wernet	Como antes	Letra: Efrein Benita	Oscar Serrano	Oscar Serrano
14. Yolanda v/d Linden	Ella y tu indiferencia.	Letra: Marcelo Ferreyra	Marcelo Ferreyra	Marcelo Ferreyra
15. Krishnu Penso	Desilusión	Letra: Krishnu Penso.	Oscar Serrano.	Oscar Serrano

Diadomingo awor dia 11 di Augustus lo bay tuma lugar na Tele-Aruba e di octavo festival preseleccion di O.T.I. Aruba. E festival ta cuminsa 5'or di atardi pa 7'or di anochi.

Despues cu e directiva organisatorio di O.T.I. a decidí di sigi cu e festival apesar di e crisis economico, a drenta varios aporte di banda di musiconan mes, enterpretenan y comerciantenan.

Aunque e problema di hiba un delegacion completo Curacao ainda no ta resolvi, toch e dirigentenan tin e confianza cu esaki lo keda regla tambe. E orquesta di O.T.I. bao direccion di e joven maestro Franklin Granadillo a duna un contribucion enorme e aña aki. Durante e ensayonan nos por a ripara cu tin varios cancionnan hopi fuerte atrobe. E compositornan, arreglistanan, directornan y enterpretenan - tur e mihor nan di Aruba a haci nan maximo esfuerzo pa e nivel di O.T.I. keda como e aconticimiento mas grandi di aña.

Hopi sacrificionan gran-

di a wordo haci den un tempo relativamente corto pa salvaguarda O.T.I., pero e sacrificionan aki sigur lo no ta envano.

Aruba henter ta keda invita pa sintoniza Tele-Aruba diadomingo awor 5'or di atardi pa presencia e di octavo festival di O.T.I. Esnan cu talvez ta na

warda y no tin television por sintoniza e festival como cu Addison's programs atravez di Voz di Aruba lo transmiti pa di 16 aña consecutivo tur e festivalnan cu Promocion Cultura Arubano ta organiza. E festival di diadomingo awor ta priminti di bira algo fabuloso.

FLOR DI PALISIA CU GRUPO CHANGO

ORANJESTAD(AAN)—Diabierna awor pa 8 or anochi den Centro di Barrio Noord lo tin presentacion tambe di Grupo Chango, grupo di baile folklorico di Venezuela.

Hunto cu Grupo Chango lo actua tambe e grupo popular di baile, Flor di Palisia durante e anochi cultural, ademas lo ser presenta un grupo di musica tipico di Aruba.

Grupo Chango ta consisti di 15 bailarin cu ta presenta danzas latino.

Entrada ta gratis e anochi aki.

CHARLA

Den Centro di Barrio Bra-

zil lo tin un charla dialuna dia 12 di e luna aki, especialmente pa juventud.

E anochi di charla aki lo ta di 7 or pa 9 or y mayornan tambe ta invita pa participa na e charla ya cu e topico lo ta basa ariba juventud.

BARATILLO BARATILLO
Costo di bida a subi drastico na Aruba, no obstante nos ta **BAHA PRIJS keto bai!**
Nos **GALLINA** pa **SOPPIE**
Antes tabata fl. 1.50
Awor a bira fl. 1.00 SO!
"SANTA ELENA CHICKENFARM"
Di Dialuna - Diasabra
8 - 12 y 2 - 6'or

CARACAS

Hotel Plaza Catedral	22 Aug. 1985 25 Aug. 1985
FLS.	Ta inclui: Pasashi/Tax na Aruba/ 3 anochi na Plaza Catedral Coupon di Descuento. Opcional: impus dia salida na Venezuela/traslado y late check-out.
175	
TPL.	
Dbl. 193 Sgl. 240 Mucha 120	
EL MUNDO KANGURO ARUBA TEL. 32185 - 23706	




TIRE
mescos cu NOBO, pa solamente
Fls. 35,-
TAMAÑO
165-13 165-12 185-14
155-13 155-12 175-14
Na
SUPER WAREHOUSE SALE
Dilanti Sportshop Antilliana
na Schelpstraat.9

DEPORTE

ORANJESTAD(AAN)—Golden Gates manera ta conoci a gana Kibaima All Stars den e final pa Copa Heineken, cual partido a bay 11 inning y cu emociun di cumintamento te fin.

Golden Gates a gana e partido 8-6 finalmente.

Den pool di veterano, ya cu Boogaloo apesar di a perde den e wega final contra Sugar Kings Vets a duna tremendo resistencia. Sugar King Vets, idolonan veterano di Savaneta a gana 4-1.

Champion Pitcher taba-

RESULTADONAN FINAL COPA HEINEKEN

ta Ga Thomas di Golden Gates cu 3-0, Champion homerun Rafael Hassell cu 2, MVP a resulta Ga Thomas di Golden Gate Stars.

Golden Gates den e poule aki a bay cu practicamente tur trofeo y e

hungador mas popular a resulta Chogogo Martilia di Golden Gate Stars tambe.

Den Vetranos, Sugar King Vets a titula campeon, Boogaloo sub campeon, Benny Geerman di Sugar Kings champion

pitcher cu 3-0, Honrone-ro Marco Lopez di Sugar Kings cu 3, MVP Marco

Lopez tambe.

Marco Lopez a conquista tambe trofeo di hungador mas popular di e poule aki.

CONTINUACION TORNEO DI SOFTBALL DI BOOGALOO

ORANJESTAD(AAN)—Despues di e prome siman cu 4 ganador ta conoci, ta sigui diadomingo awor e segundo siman di campeonato di softball di Boogaloo.

Diadomingo ultimo,

FCCA a perde di Douane, Ayo Stars a gana Racketeers, North Eagle Stars a elimina Westpunt Hitters, y Que Hiciste a scama Scampy. Den domino Lucas Bols a gana Racketeers.

E siman aki ariba tereno di Montaña Divi Divi Tigers ta enfrenta Antilliaanse Handelmij, pa 10 or, Algemene Bank ta hunga contra King Casino Rolando's 2 or ta enfrenta Blue Swallow y 4 or Astros ta subi tereno con-

tra Sabana Grandi Stars. Den domino Douane ta

hunga contra Woeste Honden.

TULA SNACKS Y ROMA A GANA COPA HEINEKEN

ORANJESTAD(AAN)—Den e campeonato di futbol pa Copa Heineken, den poule comercial Tula snacks a titula campeon y Cruzeiro sub campeon.

Goal getter den poule comercial tabata Junior Irausquin di Cruzeiro cu 3 goal.

Den poule di veteranos Roma a titula campeon y Atlantico Maxell sub campeon.

Goalgetter den e poule

aki a resulta Obrey Maduro di Roma.

E wegaamistoso di domino a ser gana pa Migred Snacks 21-13 di Sabanilla Abao Stars.

Astros cu a organiza e torneonan aki a keda masha satisfecho cu e acogido cu nan a ricibi, y e cooperacion di sponsor di e torneonan, Mito v.d. Biezen cu e cuerpo di umpirenan, y di DIARIO cu a informa di e campeonato tur e simannan.

ARUBA A SER ELIMINA AYERA

ORANJESTAD(AAN)—E seleccion di Aruba na Venezuela a batalla fuertemente ayera anochi, pero nan mala suerte tabata e suerte di Venezuela cu a bin gana e seleccion di Aruba 8-4, eliminando Aruba for di e campeonato Latino Americano di baseball Senior Division.

E aña aki un biaha mas ta Curacao ta keda cu e oportunidad ainda pa por viaja dentro di algun dia pa Gary Indiana, y ta Cu-

racao lo mester enfrenta Venezuela awor.

Venezuela a pica dilanti cu un careda den e wega aki, pero homerun di Joseph Milliard cu corredor ariba base a duna Aruba e ventaha di 2-1, pero cual ventaha nos muchanan no por a sigui mantene debi na errornan 6 en total cu a ser cometi. Especialmente den e ultimo dos inningnan nos muchanan a basha den otro y Venezuela a pro-

becha di esaki pa bin gana 8-4.

Aruba sinembargo a duna bon competencia na Venezuela y a muestra un biaha mas cu nos seleccionnan ta seleccionnan di respeta den e torneonan aki.

Diasabra awor nan ta regresa y ta ser spera sinembargo cu un publico grandi lo ricibi nan y felicita nan pa e gran papel na Venezuela.

INVICTO DI BRAZIL COCA COLA A CAY

ORANJESTAD(AAN)—Ayera anochi Natural Health Center ex-Galeria Moderna den volleyball masculino A classe a kibra invicto di Brazil Coca Cola.

Ayera anochi mes e uniform nobo di Natural Health Center a ser bautiza pa Yvette Muller, den presencia di Sales Manager Raymond Slagt, Juan y Luz Marina, Stanley Pieterella y Rudy Leysner.

Despues di esey e equipo a subi tereno pa nan encuentro contra Brazil Coca Cola.

Natural Health Center Pepsi Cola a gana e prome set facilmente 15-6, pero Brazil Coca Cola a reacciona den segundo set cu tabata un set masha emocionante y bunita, pa finalmente bin gana cu score di 16-14.

Natural Health Center Pepsi Cola den tercer set a lucha duro cu Brazil

y aki tabata muestra cu cualquier di nan por a gana e set. Natural Health Center Pepsi Cola finalmente a bin gana 15-13.

E di cuatro set tur hende a spera cu Brazil lo bin reacciona fuerte pa trata na salba nan invicto, pero e uniform nobo parce tabata tin su druppel di suerte cune pasobra Natural Health

Sigui lesa pag. 9

SOCRATES KIER REGRESA CAS

MODENA:—Socrates, e medico top futbolista Brasileño, cu ta hungando na Italiacentro delantero pa Fiorentina kier regresa "su cas."

"Mi curazon ta cerca mi hendenan den mi patria", e medico futbolista a declara.

Socrates a bay hunga na Italia temporalmente pasa pa hopi placa. Su entrada anual ta mas o menos 750 mil florin (antillano). "Alegria den hungamento di futbol aki, e diverticion di futbol ta imposibel, of mihor dicho, mi nunca tabata tin e alegria of diverticion ey", el a bisa.

Socrates cu a ser trasla-

da di Corinthians pa Fiorentina pa e suma di 3.5 millon florin (antillano) ta sperando awor ariba un club di Brazil cu lo ta interesa den dje. Fiorentina su interes ta den Falcao cu ta e futbolista mihor paga na Europa compatriota di Socrates.

NISSAN LONGBODY 1600cc



PA SOLAMENTE FI.9.500,-
TOPCAR N.V. tel. 21547
Boerhaavestr. 21 23633
23733

MARLBORO A EMPATA SERIE

Cu rally den nobeno

ORANJESTAD(AAN)—Tur cos tabata indica ayera anochi cu e equipo di Marlboro lo perde e segundo encuentro di e playoff semi final di baseball contra Coca Cola.

Pero conociendo Marlboro pa su espirito di lucha y cu no por bisa nada te ora cu out number 27 a tuma lugar, e pensa-

mentonan a bay tambe ariba un posibel racha di careda den ultimo dos inningnan di wega.

Marlboro a bay ariba na cuminzamento di e partido pero Coca Cola a bin haci e wega 5-3 y a domina pa resto di e encuentro.

Pero den ultimo oportunidad na bate di Marl-

boro den nobeno inning, e cigarilleronan campeon a rally pa anota 3 careda pa asina tuma ventaha di 6-5 y dominando Coca Cola despues pa cera e inning Marlboro a gana e encuentro.

Pitcher ganador tabata Juvenal Nava cu tabata tin un gran relevo. Den octavo el a releva Hugo

Daou.

Pitcher perdedor a resulta Joseph Koc. Coca Cola a usa den e partido aki Jozef, Henk Arnold y Nicomedes Thijsen.

Marlboro a conecta 9 hit y no a comete error mientras cu Coca Cola a conecta 7 hit cometiendo 2 error.

Ambos equipo a laga 9 coreador ariba base.

Fe van der Biezen tabata mihor bateador pa Marlboro y Alvin Albus pa Coca Cola, ambos cu 2 hit den 3 turno.

Diabierna awor lo tin e tercer partido entre e dos equiponan aki, mientras cu awe nochí Richmond y Aruba Video Center ta subi tereno un biaha mas contra otro den nan tercer encuentro tambe.

DAKOTA TA SIGUI COMO LIDER DEN FUTBOL

ORANJESTAD(AAN)—Cu 12 punto pero cu 1 wega menos hunga cu RCA y dos wega menos hunga cu Bubali, Dakota ta sigui como lider den e campeonato di futbol division di honor cu 5 gana 2 empata 3 perdi, 16 goal na fabor, 9 goal contra 12 punto y promedio di 1.20.

RCA ta sigui cu 11 we-

ga hunga, 5 gana 3 empata 3 perdi, 11 goal na fabor, 15 goal contra, 13 punto y promedio di 1.18.

Bubali tin 12 hunga, 4 gana, 5 empata 3 perdi, 12 goal na fabor, 10 goal contra, 13 punto y promedio di 1.08.

Na di 4 lugar ta sigui Estrella cu 12 hunga, 4 gana, 3 empata, 5 perdi

17 goal na fabor, 13 goal contra, 11 punto y promedio di 0.92.

Universal ta na di 5 lugar cu 12 hunga, 3 gana 4 empata 5 perdi, 13 goal na fabor 20 goal contra 10 punto y promedio di 0.83, y den soto ta ser haya San Luis Deportivo cu 11 hunga, 2 gana, 5 empata, 4 perdi, 9 goal na fabor, 11 goal

contra, 9 punto, promedio di 0.82.

Diasabra venidero RCA

ta enfrenta Dakota den Lago Sport Park pa 7.45 or anochi.

HEFE DI ESTADO MAS FIT NA MUNDO TA PROME MINISTRO DI ISRAEL

JERUZALEM: E revista americano pa Bodybuilding, "Muscle Training Illustrated" ayera a nombra Shimon Perez, prome ministro di Israel como e hefe di estado mas fit na mundo.

E preme ministro sin embargo a rechaza un reto pa competi den "poels" cu un luchador di poels.

Dan Lurie, editor di e revista Muscle Training Illustrated a ofrece Perez un trofeo di oro.

Di tur mi investigacionnan a resulta cu Perez ta e hefe di estado mas fit cu tin, el a bisa.

E prome ministro di 62 años cu ta un humador fuerte mescos cu e prome ministro anterior di Israel Golda Meier, tin

como hobby lesa e revista menciona, mira serienan di television arabe den estilo Dallas y competi amistosamente den poels pamira kende tin braza mas fuerte.

Su vocero ta bisa cu Perez cu ta hopi robusto, ta haci hopi ehercicio, traha duro y tin un constitucion natural.

Lurie cu a investiga 7 pa 8 lider mundial criticamente prome cu el a dicidi ariba Shimon Perez a saca un foto grandi for di su archivo mostrando su persona ta poels cu Ronald Reagan. El a haci un invitacion na Perez pa duna un ehemplo tambe.

"Masha danki, pero no awe", Perez a bisa y a agrega "ken sa kizas otro biaha".

HUELGA DI BASEBOLISTANAN A TERMINA

Grandes Ligas ta continua awe

ORANJESTAD(AAN)—Segun informacionnan ricibi ayera, for di Estados Unidos, New York ta bisa cu tin un acuerdo pa solucion e huelga di 48 ora di baseball liganan grandi.

Informacion cu a drenta di New York ayera ta indica cu e asociacion di peloteronan a yega na acuerdo cu doñonan di equipo cu ta segura cu pa awe e itinerario normal di actividadnan lo por reanuda den baseball liganan grandi.

For di dialuna no tabata tin baseball grandes ligas, ora cu primeramente ayera a trata insistentemente un que otro bao guia di Peter Ueberoth pa logra un acuerdo pero sin exito.

Ayera tempran e nego-

ciacionnan a continua y tabata conoci na e momentonan cu no tabata tin mucho cos pa separa un acuerdo.

E ultimo punto conflictivo tabata si e arbitrahe mester bay pa peloteronan pa dos of tres año y si un arbitro por tin e poder pa duna salario cu ta mas cu dos biaha loque un pelotero tabata gana.

E puntonan aki a keda pendiente, y aparentemente a yega na acuerdo ariba esaki ya cu a keda di duna un conferencia di prensa pa anuncia cu e solucion a ser logra. E conferencia di prensa lo ta di Comisionado di baseball y di dirigentenan di Asociacion di peloteronan y Asociacion di doñonan di equipo.

E informacion aki pa

fanaticonan di baseball tabata agradable ya cu for di awe nan por ta segura cu e weganan lo continua.

Den e asunto di huelga si a sali na cla cu fanaticonan no tabata contento cu peloteronan a drenta den huelga y tabata tin hasta papia cu fanaticonan lo por bay boycotea e equiponan si nan gana e huelga contra di doñonan di equipo ya cu e peloteronan ta gana un cantidad grandi di placa y awor ta exigiendo mas ainda. E peloteronan sin embargo ta haya cu nan exigencianan ta justo considerando locual nan ta produci pa doñonan di equipo cu nan profesion.

Acuerdo tin y awe e campeonato lo ser reanuda.

INVICTO

Sigui lesa pag. 8

Center Pepsi Cola a sali raso y a bin gana e set aki 15-7 y asina tambe gana e partido.

Den B clase damas, Albo a enfrenta Centro di Bario Noord.

Centro di bario a gana e partido facilmente den

dos set sigui cu scorenan di 15-5 y 15-3.

Diabierna awor ta SSS Topcar den A clase damas lo enfrenta Centro di Bario Noord y despues den A clase caballeros Penha Strikers ta topa cu Aruba Video Center.

CALIBER

Como cu Sr. J. v.d. Kuyp aparentemente no ta na altura di ken ta e personanan cu ta duna les na Universidad di Antillas, y e ta gusta scherm cu nombenan di e profesornan ki ken el a haya les, como ex-alumno di Universidad di Antillas mi kier a menciona aki bao, pa Sr v.d. Kuyp su informacion, algun di e profesornan di ken mi tabata tin e privilegio di ricibi les durante mi estudionan cu mi a haci na e universidad menciona. **ERFRECHT & HUWE-LIJKSGOEDEREN**—RECHT di profesor v.d. Burght di Universidad di Amsterdam. **ZAKENRECHT & NO-TARISWETGEVING** di profesor Kleyn di Universidad di Leiden. **INTERNATIONAAL PRIVAATRECHT** di profesor COhen-Henriquez di universidad

di Groningen. **VENNOOTSCHAPS**—RECHT di profesor Maer y prfesor Honée di universidad di Rotterdam. **CRIMINOLOGIE** di profesor Hoefnagels di Erasmus Universiteit di Utrecht. **BURGERLIJK RECHT** di profesor Sprijt di Universidad di Utrecht. **BURGERLIJK RECHT** di profesor van der Grinten profesor emerito di Universidad di Nijmegen. **RECHTSFILOSOFIE** di profesor Luijpen (dif) di T.H. Delft.

Mi ta sigur cu cada un di e profesornan aki un pa un ta por lo menos di e mes un kaliber cu esunnan di ken Sr. v.d. Kuyp a haya les na Hulanda, pues unda e argumentonan di Sr. v.d. Kuyp ta keda den e sen-

tido cu e nivel di Universidad di Antillas ta mas abao cu di e universidadnan na Hulanda? Of ta tactica di esunnan cu no ta sinti nan mes sigur di nan mes, Sr v.d. Kuyp kier usa y ta trata di haci otro pigmeo pa nan mes por aparece como un gigante?

Alfredo Rosenstand
Venezuela no.1
Aruba, tel: 2-4900

REMITIDO

TA BUSCA

TA BUSCA
Pa cumpra File
Cabinets
Segunda Mano
Yama Tel.31928/32188

**MAID
WANTED
PLEASE CALL
PHONE
22869**

**TA BUSCA
UN CRIA**
cu por papia ingles
cu bon referencia di
trabao. Yama tel.23767
pa mas informacion

TA BENDE

TA BENDE
Un PICK-UP Dodge
1979 model D150,4
speed floor shift
den bon condicion
Seroe Blanco 57
O'stad

TA BENDE na
Cas Paloma 15/ 28140
1 set di sala(1 sofa y 2 zit
bank)700,-,1 tapijt(2x3
meter)200,-,1 mesa pa sa-
la 175,-,1 plafondlamp(5
gloeilampen)200,-,1 pla-
fondlamp(3 gloeilampen)
125,-,1 mesa y 4 stoel
150,-,1 kashi boeki
1 wandmuebel 150,-,1
wandspiegel en tafel 250,
1 G.E. ijskast(no frost)
600,-,2 cuadro grandi 10,
cada uno,,3 cuadro chiki-
to 45,- cada uno.2 junior
-bureau-150,- y 100,-,1
schemerlamp 35,-,1 video
player Beta 500,-,1 Qua-
sar TV 19 inch color 500
diferente pronkstukken

TA BENDE
Un TRAILER di un kam-
ber cu baño,e tin aircó y
un three-in-one
(frigidaire,stoof y laba
plato).Pa mas inf.
Tel: 33261

TA BENDE
TV Color 19 inch cu su
radio am/fm f.550,-
1 Video Beta 600,-
1 radio cassette,2 speaker
grandi 125,-
TEL: 21486

TA HUUR

TA HUUR
UN CAS FULL MEUBLA
of bashi, cu 3 camber,2 baño
1 camber priva.Pa mas infor-
macion pasa personalmente
despues di 2'or di atardi
PONTON 64

TA HUUR
APARTAMENTO
muebla cu Aircó-pa un of
dos persona
TEL: 21630

TA HUUR
APARTAMENTO
muebla cu aircó of sin
aircó pa 1 persona of 1
pareha sin jui
Seroe Blanco 57

TA HUUR
APARTAMENTO mue-
bla y espacioso
pa 1 of 2 persona,awa,co-
riente,gas inclui
Wayaka 35
Tel.23327

TA BENDE

TA BENDE
2 RENAULT'S 16 TL
cu pieza
AYO 39 B

TA BENDE
Un BUICK Electra-225
modelo 1979,full equip-
ped,den bon condicion
fls.3500,-,y ta vende
HAVO-BOEKEN
TEL: 27163

WE SELL BOLIVARES

Cont:Jenny Wever
Concorde Casino Office
Only between
12:00 noon- 2:00 p.m.
Rate 1 VBS= NAF.0.13

FOR SALE
1 Sony Trinitron 19" color tv
less than 2 yrs old fl.600,-,1
Sony front loading video Play-
er less than 1yr old fl.700,-
1 brandnew AT&T answering
machine telephone fl.300,-
Tel. 26655 after 6 p.m.

TE KOOP
Goede auto LADA 1982
nieuwe accu & 20.000km
beurt,motorisch in goede
staat.Prijs nader overeen te
komen.Tel. 32094.Pampoen-
straat 15-C Dakota

TA BENDE
Na W.S.B.(Brasil) UN CAS
3 camber,2 baño,sala,come-
dor,cushina,patio overdekte
garage.Interesadonan por ya-
ma Tel. 32255.

LOTTO LOTTO LOTTO
Cu e Prome premio di mas of
menos 25/26 mil florin.
Bo a lubida di cumpra ? No
ta nada.Pasa trempa cerca
nos y cumpra bo LOTTO
LOCO. Cantidad ta Limita !!
****JARDIN ARUBA****
Sq.Nassaust y La Sallestr.
Tel. 21511

TA BENDE
UN BUICK SKYHAWK
1978 den bon condicion.
Pa mas informacion 28012 of
21307 Piedra Plat 22

TA BENDE
JEEP SUZUKI '84
4 wheel drive
Prijs Fls. 7.500,-
NUÑA 7 - B
Tel. 32018

LOTTO LOTTO LOTTO
Pasa cumpra Bo LOTTO tur
siman for di Dialuna te Dia-
huebs atardi na:
**RICHARD'S
LAUNDROMAT**
Piedra Plat 11 - C

SENADOR

Cont. di pa. 6

contradeci e procesver-
bal traha y ta bisa cu el
a ser haya den e oficina
na e ora laat ey solamen-
te pasobra e mester a pre-
para un documento pa
congreso encuan to "Se-
guridad publico".

Pakico e mester a kita
mas paña cu su badchi

pa prepara e documento
e no a declara.

Tanto polis como e par-
lamentario ta di acuerdo
cu un cos si cu ta cuadro
cu otro.

Esey ta cu e muher den
e caso aki tabata ningun
otro cu un inspectora di
polis.

ATTENTION

COMPUTER WORLD has moved from
BOULEVARD CENTER
TO



Boolchand's

NASSAUSTRAT 51
Tel. 24091, P.O.Box 170



apple computer

ATENCION

COMPUTER WORLD
A MUDA for di: BOULEVARD CENTER
PA:



Boolchand's

Nassaustaat 51
Tel: 24091, P.O.Box 170

770/10-7 Band Equalizer Booster.
Slim Type.



FLS 75.=

PIEDRA PLAT


ENTERPRISES



BOLS

ELKE DAG EEN GLAASJE

Foto al minuto,cla unbez
pa pasaporte,cedula,rijbewijs
etc.na FOTO BOEKHOUDT
(Chonay) na playa den
Spinozastraat 2.Tambe nos ta
traha calidad cu no ta detoria
nunca y esun di porselein pa
un ser keru cu ni solo ni awa
ta caba cune.
9'or -12'or / 3 or -6'or



WORLD VIDEO

Pa bo mihor pelicalanan

A CABA DI HAYA

Wrestling ★

DRAMA

ADVENTURE

COMEDY

SCIENCE-FICTION ★

LOVE STORY

Pa nos amantenan di



WRESTLING

tin pelicalanan nobo ariba nos rekinan ★

LUCHA LIBRE Nobis Nobis !

RICKY STEAMBOAT
V/S
GREG THE HAMMER VALENTINE

TACTEAMMATCH
entre
IRON SHEIK - NIKOLAI VOLKOFF
V/S
BARRY WINDHAM - MIKE ROTUNDO

PASA AWE
WILHELMINASTRAAT 81



MAGNATE DI TELEVISION DI CABLE A CUMpra MGM/UA

NEW YORK: E magnate di cable di television Turner a compra MGM/UA y a nenga di sigui cu intencion di compra CBS.

Conseho di directiva di e concern di recreacion, MGM/UA (cu a ser funda despues di fusion di e companianan cinematografico Metro Goldwyn Mayer y United Artists)

a bay di acuerdo cu venta di e empresa na e magnate di television di cable Ted Turner, propietario di e compania di television di cable Turner Broadcasting System TBS

A yega na acuerdo cu Turner lo paga pa accion 29 dollar en efectivo di manera cu e prijs total ta monta na efectivo, 1.5

miljard dollar mas o menos. TBS y MGM/UA a anuncia esaki ayera.

Parti di e acuerdo ta cu inmediatamente despues cu Turner haya tur e accionnan e lo vende United Artist pa 470 milyon dollar na e inversionista americano Kirk Kerkorian cu te ainda tin mayoria di accion 50.1 por ciento di MGM/UA.

INTERNACIONAL

Un vocero di TBS no por a declara ayera con Turner lo financia e compra aki.

Asina cu a anuncia e acuerdo, Turner a laga sa cu e ta deshaci di su intencion di compra e cadena di television CBS. Si man pasa caba e mester a suspender su esfuerzonan pa motibo cu CBS cu semper tabata contra negoshinan di Turner a resisti y a logra compra back 21 por ciento di su mes accionnan.

Si man pasa ainda Turner a abisa cu apesar di e exito chiquito aki di CBS e tin intencion ainda di compra e compania CBS.

E kier a regla algun asunto financiero prome cu e dicidi.

MGM/UA ta den problema financiero. Cu venta na balor di 478 milyon dollar e concern a perde 66.2 milyon dollar den prome 9 lunanan di e aña fiscal aki.

Pa Turner MGM/UA ta un inversion atractivo pa motibo cu e concern ta propietario di un di e archivonan di pelicula mas grandi di mundo.

Door di tumamento over di e compania aki Turner lo por haci uso tranquil di e archivo y peliculanan y pasa nan ariba su canalnan di TBS sin mester paga pa esaki.

SARNEY TIN PLAN CONTRA VIOLENCIA DEN CIUDADNAN

BRASILIA:—Presidente di Brazil, Jose Sarney, e siman aki a publica un programa di gobierno pa combati violencia den ciudadnan di Brazil.

Violencia ta aumenta pa aña cu 10 por ciento.

E programa lo costa un miljard (florin hulandes).

Gobierno lo tuma tanto medidanan represivo como preventivo pa combati consecucionan y causanan di violencia" el

a declara na funcionario-nan di polis y representantes di comitenan civil.

E plan ta encera entre otro reformacion den aparato policial, persecucion rapido y haci e proceso judicial mas rapido y eficiente y pa mehora situacion den prisionnan.

Otro meta di e programa ta pa combati violencia den interior. Aki e

idea ta pa trece solucion pa e problemanan encuan-to propiedad di terreno cu segun funcionarios di iglesia, ta causa morto anualmente di 200 hende.

Segun estadisticanan e cantidad di asenatonan na Rio de Janeiro den dos aña a aumenta cu 22 por ciento, y a ser registra 43 por ciento mas ladroneria y robo.

INDIA TA TENE DECISION Ariba BOM ATOMICO HABRI

NEW DELHI: Gobierno di India a dicidi di mantene e decision pa fabrica bom atomico habri.

Na Pakistan tabata tin informacion cu e pais aki

si ta desarollando un bom atomico. Segun un funcionario di asuntonan di exterior, gobierno di India ta spera cu sinti lo triunfa na Pakistan y

cu e gobierno lo hala aden su decision di produci un di e bomnan aki.

India por traha un bom atomico y tin tur cos pa haci esaki, el a bisa. Na 1974 caba un prueba a ser haci. E prome ministro e tempo ey di India, Indira Gandhi a declara cu e prueba a ser haci pa metanan pacifico.

PROCESO CONTRA AGENTE DI FBI SPION

LOS ANGELES:Na Los Angeles California a cuminsa e proceso contra e prome y unico agente di FBI, cu ta ser acusa di spionahe pa Rusia.

E denuncia contra Richard Miller di 48 aña ta cu e tabata entrega dosiennan confidencial na agentenan di spionahe di KGB di Rusia y tabata ser paga pa esaki.

Miller cu tabata perte-

nece na iglesia Mormona y cu a ser excomunica, tata di 8 yiu tin un serie di violacion cometi como agente di FBI y a admiti nan. El a desmenti di a yega di spiona pa e rusonan. Segun e acusacion el a pasa documentonan secreto confidencial na e spionnan Svetlana y Nikolai Ogorodnikov.

Svetlana un rubia bunita
Sigui lesa pag. 14


Sra. Viuda Ida Winterdaal - Croes y yiu nan ta invita pa recorda 1 aña di morto di difunto

SAVINIO BINCHI
WINTERDAAL

Na iglesia Santa Filomena na Paradera, Awe 8 di augustus 1985 pa 7'or di anochi.

INVITACION
Na ocasion di e dos aniversario di fallecimiento di nos yiu stima

RODNEY O.
MADURO



Nos ta invita tur famia, amigo y conocirnan na un Santo Sacrificio di Misa cual lo tuma lugar Diahuebs dia 8 di augustus pa 7'or di anochi na misa Sagrado Corazon na Savaneta.

Na number di su mama, tata y su dos ruman.

A fallece cristianamente:

SR. VALORIANO KELLY

Mihor conoci como Bito

Na number di su yiu nan:

Ignacio Orman, señora y yiu nan

Julietta Kelly, esposo y yiu nan


Natalia Sam Kelly y yiu nan

Virgilio Kelly y señora

Benito Kelly señora y yiu nan

Ruben Kelly, señora y yiu nan

Su niet y nietanan, bisanietonan, sobrino y sobrina nan, comer y compernan, primo y primanan, demas familianan : Kelly, Sam, Orman, Marin, Wolter Rosel, Paesch, Farro, Heronimo, Tjien Kon Fat, Conradus, Everon, Bustillo, Gei, Odor, Brion, Zambrano, Flanegin, Tromp, Britten, Gomez, Krozendijk, Christiaans, Ridderstaat, Figaroa, Quandus, Oduber, Maduro, Kock, Leito, Thijsen, de Lange, Holsman, Martinez, Leon, Villaroel...Na Bonaire familianan:Salsbach, Gomez, Nicolaas, Augustin, y Bernabellla.-Na Curacao familianan Mervelina y Hilario, ta invita tur bisiña, amigonan y conocirnan, pa asisti na e acto di entierro cual lo tuma lugar diahuebs dia 8 di augustus pa 4.30 or atardi, saliendo for di iglesia San Fransisco y despues pa santana catolico na Playa. Agencia Funeraria del Pueblo ta extender su mas hondo condolencia na e familianan di e fallecido. Despues di entierro no ta ricibi bishita di condolencia na cas.



INTERNACIONAL

BUENOS AIRES:—E americano Carl McIntyre, presidente di "Conseho Internacional di Iglesia-nan cristiano" ta acusa e Conseho Mundial di Igle-sianan di a ser infiltra pa comunistanan.

E conseho Mundial di Igle-sianan ta papia hopi di derechonan humano, segun McIntyre durante un conferencia di prensa na Buenos Aires, pero nan no ta menciona nada di violacion di derechonan humano na Union Sovietica.

E conseho mundial no por ser considera otro di

cu e ta aliado di comunis-tanan, segun e luchador contra e conseho mun-dial, di 80 aña di edad.

McIntyre ta asisti na e reunionnan di Conseho Mundial di Iglesia, como periodista. E ta redactor tambe di su revista reli-gioso. E ta un di e parti-cipantenan mas activo na e conferencianan di pren-sa. Su propio conferen-cia di prensa el a tene den un di e salanan cu ta ser usa pa conferencia di prensa door di e Conseho Mundial di Iglesia.

Cu seguridad el a sa di menciona cu e secretario

general di Union Baptis-ta di Rusia, Ir. Alexei Bit-sjokov ta un agente di Servicio Secreto di Rusia KGB.

E tabata masha contra tambe participa cion y presencia di e tjeco Dr. Jan Michalkjo, miembro di e comite central di conseho mundial di igle-sia y cu ta envolvi den e conferencia di paz cris-tian, y di e metropolitano Indio Paulos Mar Grego-rius, un di e presidente-nan di Conseho Mundial.

Gregorius ta miembro di conseho mundial di paz y ta ser bisa cu e tin la-

zonan masha estrecho cu Kremlin.

McIntyre a funda su mes organizacion den e mes aña cu cConseho Mundial di Iglesia a ser funda, esta 1948, na Am-sterdam. Na Hulanda no tin ningun iglesia di su organizacion. Durante e asamblea di Conseho Mundial di Iglesia dos aña pasa na Vancou-ver, el a demostra con-tra un cantidad di cana-des cu tin den e Conseho Mundial.

Na Buenos Aires ariba e anochi di apertura el a bay solamente cu su es-posa pa por distribui e

revista 'Christian Beacon'.

Den capital di argentina e ta ser compaña pa Ma-jor Edgar C. Bundy cu ta director di relaciones pu-blicas di dje.

Siman pasa Major Bun-dy a studia un foto gigan-tesco di e Comite central cual a ser saca aña pasa na Ginebra. Tur persona ariba e foto tabata nume-ra.

Den Conseho Mundial di Iglesia mes nan no ta tuma McIntyre na serio. Ta e americano McIntyre so ta tuma su mes na se-rio y ta yama su mes un fundamentalista conven-ci, anti comunista y pa-triota.

NAGASAKI NO TABATA SOLAMENTE UN SEGUNDO HIROSHIMA

NAGASAKI: E bomba Atomico Fat Man cu a ser lanza dia 9 di Augus-tus 2 minuut pasa di 11 mainta ariba Nagasaki, a costa bida di por lo me-nos 70 mil hende.

E bom aki tabata tin un forza di destruccion hopi mas grandi cu "Lit-tle Boy", e prome bomba

atomico cu a ser lanza al-gun dia anterior ariba Hiroshima.

Pero den relatonan americano masha poco ta ser menciona di e trage-dia di Nagasaki, y esaki special den relatonan his-torico.

Nagasaki no tabata sim-

plemente un segundo Hi-roshima. Nagasaki no ta-bata manera Hiroshima, un ciudad di guarnizon y no tabata tin un industria grandioso pa produci arma.

Tripulantenan di e avion cu a transporta e bom di 4 tonelada y mei

tabata tin encargo pa la-ga e bom cay ariba e isla Kyushu, unda lo tabata tin un deposito di arma.

E isla tabata scondi tras di nubianan pisa y e avion a desvia poco di su ruta. No por a mira Nagasaki tampoco for di e altura pasobra e ciudad aki tambe tabata tapa pa nubia scur. Finalmente a logra haya un habri y e tripulacion di e B-29 no a vacila y a laga e bom los.

Algun seconde despues den e ciudad fierno a ex-plota.

Hiroshima tabata den un valle y a ser destrui casi completamente.

Nagasaki tabata un ciu-

dad cu tabata consisti di hopi bario cu tabata se-para pa montañanan.

E bom a explota ariba e bario Urakami di ma-nera cu e centro di e ciu-dad historica casi no a ser destrui. Apesar di esey e explosion a costa bida di un tercera parti di e 210 mil habitantenan.

E bombardeo di Na-gasaki a pone cu gobierno nilitar di Japon a dicidi definitivamente di capitu-la.

Alcalde Hitoshi Moto-shima a declara e dianan aki. "Nos kier garantiza cu Nagasaki tabata e ul-timo ciudad na mundo cu a ser destrui pa un bom atomico".

VATICANO A PRESTA PLACA NA SEMI-GOBIERNO SUD AFRICANO

GINEBRA: "Si bo acepta e declaracion literalmen-te por completo, vocero Joaquin Navarro Valls di Vaticano, tin razon cu su nengamento cu Banco Vaticano a presta placa directamente of indirec-tamente na Sud Africa.

Esaki ta reaccion di se-ñora Eva Militz, cu a compila unrapport di 130 pagina cu apoyo di e pro-grama pa combati racis-mo di Conseho Mundial di Igle-sianan, encuan-to fianzanan internacional na Sud Africa den perio-do di medio 1982 pa fin di 1984.

Señora Militz cu actual-mente ta miembro di staf di e programa di Conseho Mundial di Iglesia ta de-clara cu e instituto pa tra-baonan religioso, manera Banco di Vaticano su nomber ta realmente, tin un interes mayoritario den accionnan di Banco di Roma Per La Svizzera, na Lugano, Suiza.

E banco ey durante e periodo menciona a duna 5 fianza cu un suma to-tal di 550,4 millon florin, na Servicio di transporta-cion Sudafricano, Coreo y comunidad di Johannes burg.

E prome dos organonan por ser considera como empresanan semi guber-namental.

Señora Militz no a reac-ciona ariba e nengamento di Vaticano pasobra esaki tabata dirigi contra publi-cacionnan. El a declara cu el a haya su datonan di fuentenan publico, ma-nera revistanan specializa y pagina financiero di co-rantnan.



A fallece tragicamente na Hulanda:

YOLANDA VAN HORST HART

Na number di su esposo Henk y di su yiu Maikel
Mama; Carmen Hart
tata Emirto Hart
Rumannan:

Juan, Diana, Silvio, Richard
Amira, Orelis, Hubert
Jacqueline y Shirley
Welo: Jacinto Peña---madrina Irena Helder---padrino Antonio Koolman---tanta y omonan, primo y pri-manan, demas familia Hart, Peña, Helder, Koolman Kelly, Henriquez, Maduro, Hirschfeld.
Acto di entierro lo tuma lugar Diasabra venidero na Vlaardingen, Hulanda.



ALEMANNAN A HUY PA AUSTRIA

WENEN: Cuatro Aleman di Alemania Oriental a logra cruza frontera y huy pa Austria via frontera Austriaco-Tjeco. Segun informacion ofi-

cial divulga na Viena, e hendenan cu a logra refugia ta dos ruman, chofer, di 23 y 24 aña, un amiga bendedora di un di nan, cu ta un dama di 32 aña cu un yiu muher di 12 aña cu tambe a refu-

gia cu nan. Tur ta bini di Erfurt.

na e momento ey, sin cu nan a ser descubri.

E grupo a yega cu auto te na e frontera Austriaco-Tjeco, y a cruza frontera na pia haciendo uso di e tempestad cu tabata tin

Despues di a keda na Austria corto tempo, nan a haya permiso pa sigui pa Alemania Occidental manera tabata nan deseo.

ECONOMIA MUNDIAL

E cantidad di numbertan di auto cu a ser entrega pa autonon nobo na Inglaterra na juli a yega 42.428, locual ta 2.14 por ciento menos cu na juli aña pasa. Agentenan di auto ta kere cu e reduccion aki ta artificial pa motibo cu hopi hende ta sperando ariba auto nobo y un manera mas conviniente di registracion. E sistema aki lo ser introduci e luna aki mes.

Den e prome siete lunanan di e aña aki a ser bendi na Gran Bretaña total di 987.223 auto, 0.12 por ciento menos cu aña pasa den e mes periodo.

E computerconcern americano Digital Equipment Corporation (DEC) cerando su aña fiscal fin di juni a logra un venta di 1.95 milard dollar. Esaki ta 33 por ciento mas cu venta di e aña fiscal anterior. Venta mundial di Digital a aumenta cu 20 por ciento te na 6.69 milard dollar. Ganashi a aumenta tambe cu 36 por ciento te na 446.6 milyon dollar. Di e 89 mil empleadonan di Digital, 19 mil ta traha na Europa.

Durante prome cinco lunanan di 1985 Grecia a gana 303 milyon dollar na divisas for di turismo. Esaki ta 2 milyon dollar menos cu den e mes periodo aña pasa. E reduccion aki ta remarcable pa motibo cu net e aña aki Grecia a ricibi 25 por ciento mas turista cu aña pasa den e mes periodo. E deficit ariba balanza di pago Griego a yega te na 1.84 milard dollar den e prome cinco lunanan. Aña pasa esaki tabata 1.32 milard dollar. Exportacion a baha cu 7.9 por ciento, importacion a aumenta cu 4 por ciento. door di esaki a yega na e

deficit di 2.65 milard dollar ariba balanza comercial.

Den e siguiente dos añanan Ecuador kier haya 1.4 milard dollar na credito. Segun Ministro di Finanzas, Francisco Swett e pais no kier a placa di banconan pero di institucionnan y organizacionnan internacional.

Ecuador lo usa e placa pa mehoracion di su infraestructura y pa energia, transportation y proyectonan agrario. E debe exterior di Ecuador na e momentonan aki ta 7.2 milard dollar.

Gobierno japonés a institui un grupo di trabao cu prome cu october mester bini cu medidanan pa stimula e pedida interno y asina tambe promove importacion. Director di e planbureau di Japon Ippai Kaneko ta presidente di e grupo di trabao cu mester trece proposicion nan dilanti pa regulacion di economia japonés, pa usa di capital particular den trabao publico y pa introduci siman di trabao di cinco dia.

E inversionistanan americano dirigi pa Carl C. Icahn tin interes den e accionnan restante di e compania Trans World Airlines TWA y e aña aki kier aumenta nan parti di accionnan caba na 40.6 por ciento. Cu esaki e intencion di e grupo pa tuma e compania over a aumenta considerable. Consejo di comisionan di TWA algun siman pasa a bay di acuerdo cu un oferta pa tuma over e compania Tecas Air na balor di 23 dollar pa accion, pero Icahn a surpasa esaki mientrastanto cu un dollar.

TORNADO A AZOTA COSTA CHINO

PEKING: Un tornado cu a azota costa oost di China a costa bida di 177 persona, herida 1400 otro y destrui por lo menos 20 mil cas.

E daño cu a ser causa ta considerable segun e prome informenan cu a dren-ta.

1400 boto di piscador a ser hundi, damnan a ki-

bra causando inundacion nan y daño grandi na pro-yectonan di irigacion.

Mas di 30 mil hectar di tereno a ser destrui y mas di 160 mil hectar di tereno a sufrir daño.

Na Zhejiang ta ser cosecha principalmente aroz, catuna, maishi, y verdura. Segun e corant di pueblo, miles di hende ta tuma parti den trabaoan di rescate.

IMPUESTO PAGA NA CENT PRETO

POITIERS: Doño di un restaurant frances no a duna trahadoman di belasting trabao facil pa haci. Despues cu inspector nan di belasting a bishita su empresa y exige pa e paga su impuesto, el a bay na e oficina y a paga cada cent preto.

Hunto cu algun amigo el a dirigi su mes na e oficina cu algun saco di placa. Den nan e tabata tin cent preto di un cent, te moneda di 10 frank pa paga su debe di 42 mil Frank.

Na oficina di impuesto e funcionarianan a dura

3 ora pa por a conta e placa.

PROCESO

Cont. di pag. 12

tabata haya e documento nan pa placer sexual, 65 mil dollar na oro y jas di awacero di cierto marca.


Miller a bisa cu el a cera amistad cu e pareha pa por a drenta den KGB y scapa un carera di 20 aña na FBI cual tabata dañu door di violacion nan chiquito. E kier a penetra den e organizacion ruso. Fin di juni e pareha a ser condena na 18 aña di prison pa Svetlana y 8 aña di prison pa Nikolai.

Miller lo por ser castigado na cadena perpetua.



FIESTA SHOPPING CENTER


E siman aki ta ofrece WEBOS grandi especial pa 2,60 pa dozijn Diabierna awor nos tin cantidad di articulo nobo y barata, den espacio nobo, tur tur sorto di cos.




Bo ta trahando of renobando bo cas?

Nos tin kozijn di cedar pa porta di 68,78,83,88 y 91 cm cla pa entrega na Fl.85,- pa un.

Nos tin bentana Spaño y Hulandes, midinan e.o. 60x60 cm, 60 x 90cm, 60 x 120cm y 60 x 150 cm; Tur ta bay cu 20o/o di descuento.



60 x 90 cm
Fl. 91,50
menos 20o/o



60 x 90 cm
Fl.62,50
menos 20o/o

Ariba kozijn pa bentana tin 10o/o di descuento.

Nos tin jaloezie di mahonie duradero.

Pasa duna nos un bishita.

Nos ta situa den Druivenstraat 8, Dakota, tel.23194 (cura di Juul Nieuw.)

SOCIAL



DIANA FRANKEN ta cumpli aña awe y ta ricibi masha felicitacion di su popchi Ichmin, di su mama y tata, rumannan, tanta y omonan, prima y primonan, amigo y amiga nan, madrina, swa y su amigo, y di DIARIO.

Awe ta cumpli aña e prinsesita di cas jovencita SHARITZA FRANKEN cu ta ricibi masha pabien di su mami y papi, welanan y welonan, omonan y tantanan, primonan y primanan, demas familia y di DIARIO.



Cu suma alegria nos ta anuncia nacemento di nos yiu homber:

MICHEL JEREMY
HENRIQUEZ-GERMAN

Naci: 5 Augustus '85
Ora : 18.50
Peso. 3900 gr.
Su ruman: Micheline
Mama: Maria
Tata : Michael



Masha pabien ta bay awe pa e galan del momento, CIRIACO TROMP, Picaflor di aña 30 cu ta ricibi masha pabien di su esposa, yiunan, nieto y nietanan, bisanieto y bisanietanan, suegro y suegranan demas familia, amistas y di DIARIO.

SCHOOLNAN ISRAELI LO SEPARA ALUMNONAN ISRAELI Y ARABE

JERUSALEM: Ministerio di Educacion kier prohibi contactonan entre alumnonan religioso hudiew y arabenan na school, pa temor cu nan por mescla cu otro y despues casa cu otro.

E prohibiciona ser menciona den un memorandum cu a ser manda pa tur school di parti di Jacov Hadani, presidente di seccionnan religioso autonomo di e ministerio.

"Tur contacto y encuentro entre alumnonan hudiew y arabe mester ser evita, pa temor di casamento mixto y igualdad entre hudiewnan y arabenan e ta bisa.

"Nos ta trahando den direccion di co-existencia siñando nos alumnonan di respeta otro hende y dunanan nan derecho completo," segun Hadani den un entrevista.

"Pero ta un hecho cu 80 porciento di e matrimonionan mixto ta tuma lugar den ciudadnan mixto manera Haifa".

El a contradeci cu e hibicion ta contribui na segregacion. Separacion di raza ta un di e pilarnan di sistema apartheid di Sud Africa.

"Den algun di nos school-

nan tambe tin separacion completo di mucha homber y mucha muher" Hadani a laga sa. "Esaki kizas ta significa anto cu nos ta siña nos mucha hombernan y mucha mu-

hernan pa odia otro?"

E funcionario di enseñanza a bisa di no tin nada contra cu juventud ariba 18 aña, tanto hudiew como arabe tin con tacto cu otro.

LISTA DI BIÑANAN VENENA TA CRECE

HAMBURGO: Den dos biña aleman cu no a ser investiga anteriormente a ser haya veneno di manera cu e cantidad di marcanan venena a subi pa 12 na Alemania.

Como cu ainda no ta tur marca di biña a ser investiga ta ser pensa cu e lista lo bira mas largo

tambe dlanan venidero.

Na Austria ya 350 marca di biña ta ariba e lista di biñanan den cual a ser haya veneno y dia 29 di e luna aki den un asamblea special di parlamento lo trata un ley cu medidanan fuerte y condicionnan pisa pa produccion di biña.

PLEITO FAMILIAR A CAUSA BIDA DI HENDE

ANKARA: Dos familia den un pueblo oost di Turquía a haya problema cu otro y e siman aki e problema a bira mas grandi te cu el a costa bida di siete miembro di familia.

Diezcinco otro a haya

heridanan. Tres di esnan cu a muri ta hende muher segun e informacion.

Agencia di prensa anatólico a duna di conoce cu ehercito a detene 14 persona involvi den e bringamento y ta ser busca 38 otro.

MESTER INJECTA CACHO CONTRA PARVO

ORANJESTAD(AAN)— Doñonan di cacho ta ser pidi pa laga injecta nan cacho contra parvo.

Durante lunanan augustus, september y october mester pone extra atencion na cuida di cacho.

Ta recomendabel pa laga injecta cachonan cu tin cinco siman bieuw caba y mas bieuw.

Cuido di e cacho ta bon pa e animal mes y tambe pa e doño, segun informacion di Servicio Veterinario.

CURSO Ariba HIGIENE DI CARNI

ORANJESTAD(AAN)— Dia 20 di e luna aki lo cuminsa un curso na papiamento encuan to higien a di carni.

E lesnan lo ser duna un biaha pa siman entre 7 or y 8 or anochi.

Mirando e interes cu ta existi a ser dicidi pa re-

parti e participacion den dos grupo.

Un grupo lo tin curso diamars y otro grupo dianzon.

Tur esnan cu ye a inscribi pa e curso di higiena di carni ta ser pidi pa tuma contacto cu Servicio Veterinario na telefon 21720.

PRAKTIJKDIPLOMA BOEKHOUDEN COMPUTERBOEKHOUDEN

CURSUS voor 1) Beginnelingen
2) Gevorderden
3) Herhaling

Aanvang: Maandag 19 augustus

Inlichtingen bij: BOY ESCALONA
Tel.: 23266 of 23567

Aruba's Festa
bo cas di telas

Awor den e siman escolar aki ta dunabo e oportunidad pa hasi bo compras di telas entre 12:00 pm - 2:00 pm

Tambe nos tin bistiman cosi, di nos mesun telanan. Pasa y escoje bo bistir, na bo cas di telas,

Aruba's Festa

A habri su portanan
"CHISPITA'S"
SPEELSCHOOL

cu hopi actividad pa mucha y masha leuk.

Prijnsnan ta mitar dia fl.40,-

Full dia fl.60,-

Di dialuna te cu Diabierne y porta posibel Diasabra mitar dia. Yama tel.48677 of pasa na Sav. 394 - B, puntra pa sra. Wever of Schwengle.

CUIDA BO SALUD

Discubri Bo salud tempran. Bo Wowonan ta revela Bo salud. Nos por wak tur organo den Bo wowo y cura Bo cu tratamiento natural.

MOZARTSTRAAT 10
Tel. 21343

PA TUR BO TRABAO di CONSTRUCCION

Pone Mosaico y Azulejos traha Kitchen Cabinet ect.

Yama tel.32257

POLIS

ORANJESTAD(AAN)— Un patruya cu tabata staciona na altura di Harms Brothers a nota un motocicleta pasa cu un manehador cu no tabata tin valhelm bisti.

E motociclista a ser indica pa para pero el a ha-

ci manera ta surdu e ta y a sigui core.

Polis a sigui su tras den vehiculo policial pero a perde.

Mas laat den Corvetstraat e polisnan a mire para banda di su motocicleta y nan a bay pa-

MOTOCICLISTANAN SIN VALHELM Y SIN DOCUMENTONAN

pia cune y hibe warda.

E homber aki, D.A. di 32 aña no tabata tin valhelm, tabata hibe alcohol pero su test a sali positivo pe despues, e tabata maneha e motocicleta sin rijbewijs, e motocicleta no tabata tin keurings-

kaart y no tabata sigura tampoco.

Procesverbaal a ser traha pa tur esaki y ademas e motocicleta mester a keda na warda di polis.

Mas atardi otro motociclista a ser nota sin valhelm y e tambe a ser indica pa para, locual el a haci tambe. Esaki tabata den Rockefellerstraat.

E motociclista A.T. di 17 aña no tabata tin valhelm ni rijbewijs.

Su motocicleta tambe a pasa pa warda di polis y e mes a ricibi procesverbaal.

TIRENAN HORTA Y VEHICULONAN SUSHA

ORANJESTAD(AAN)— E homber J.A. di 24 aña diamars a duná keho na recherche cu ladron a subi su tereno na Sta. Martha y bay cu 3 tire completo di un truck ademas un hop.

Na mes momento otro persona T.G. di 53 aña tambe a presenta na polis y a declara cu malhechornan a susha su jeep y un pickup cu Ajax den Oranjestad. E casonan aki ta ser investiga.

Gerente di un hotel a denuncia cu desconocinan a bay cu 4 aparato di paga candela cu tabata cologa den hotel.

E caso aki a ser denuncia pa J.L. di 69 aña.

PRONKSTUK A KEDA WARDADA

ORANJESTAD(AAN)— Den oranan di madrugada dialuna un patruya a pasa banda di un night club na Playa y a mira e homber R.N. di 37 aña

canando cu un saco den su man.

Polis a dicidi di bay tira un bista den e saco aki, y a mira un bunita pronkstuk. R.N. no por a bisa

polis na unda el a haya e pronkstuk aki. El a ser hiba warda pa interrogacion y despues por a bay cas.

E pronkstuk si a keda na warda di polis.

DETENIDONAN A NENGA ACUSACION

ORANJESTAD(AAN)— Recherche a pone man ariba dos persona, JC di 34 aña y RC di 23 aña kendenan tabata ser sospecha di e robo cu a tu-

ma lugar algun dia pasa na un supermercado den Tarabana.

E dos personanan aki tabata na punto pa viaja pa Venezuela cu

barco.

Nan a nenga di tin algo di haber cu e robo aki sinembargo a keda encarcela pendiente mas investigacion.

GUIDA O Ariba LAMA

ORANJESTAD(AAN)— Un advertencia ta ser ha-

AROBINSON CRUSOE NA RUSIA

MOSCU: Do s mucha ruso di 7 y 11 aña a biba 22 dia ariba un isla bandona den curazon di Siberia segun e corant Isvestia a raporta ayera na Moscu.

E dos Robinson Crusoean moderno, Sergei Dobrynin y Alexei Popov dia 25 di mei tabata hunga descubridoman ariba un flota west di Kolyma ora cu e flota a bolter.

Nan a logra bandona e

flota y yega e isla di 12 kilometer cuadra y eyan nan a traha un casita pa sconde.

Durante e tres simannan di nan aventura nan tabata come yerba y blaachi di mata, segun Isvestia.

Nan a ser haya casualmente. Sergei y Alexei tabata tin masha mordi di sangura y nan tabata sufrí di curazon y higrá.

ci na tur esnan cu ta sali bay pisca cu boto, of pa keiro den boto pa placer, pa corda notifica puerto prome cu salida, pa evita lo peor ariba lama ya cu nos ta den temporada di orkan.

Mester percura ademas cu boto of yate ta den on condicion y cu tin equiponan necesario pa casonan di emergencia a bordo.

Un spiel den mayoria di caso tambe ta scapa bida di hende perdi ariba lama, pues percura cu abordo tin tambe spiel.

boulevard

I

TODAY
at 8:15 p.m.



ELECTRIC
BOOGALOO
BREAKDANCE 2

boulevard

II

TODAY
at 8:45 p.m.

RAMBO
II



Action 14 yrs.

Drive - In

TODAY
at 8:30 p.m.



FAST
FORWARD

Musical 14 yrs.

CARACAS

22 pa 25 Aug
Pasashi ida/vuelta
3 anochi "Bruno"
Dob. 190. Trip 180.
Mucha: 130.

Barquisimeto

VUELO DIRECTO
22 pa 25 Aug
Pasashi ida/vuelta
3 anochi "El Principe"
Dob. 225. Trip 210.
Mucha: 130.

ROCRO
TOUR

Tel. 21433 Tur dia